



**Broj: S1 2 K 003631 10 K**  
**Sarajevo, 30.11.2010 godine**

### **U IME BOSNE I HERCEGOVINE!**

Sud Bosne i Hercegovine, u vijeću sastavljenom od sudije Esada Fejzagića, kao predsjednika vijeća, te sudija Nenada Šelede i Ize Tankića, kao članova vijeća uz sudjelovanje pravnog savjetnika – asistenta Belme Čano, u svojstvu zapisničara, u krivičnom predmetu protiv optuženog Arifa Adilovića, zbog krivičnog djela Neovlašten promet opojnim drogama iz člana 195. stav 2. KZ BiH, te krivičnim djelom Krivotvorenje isprave iz člana 373. stav 2. KZ FBiH, sve u vezi sa članom 29. KZ BiH, odlučujući po izmijenjenoj optužnici Tužilaštva Bosne i Hercegovine, broj KT-133/10 od 09.11.2010, nakon održanog pretresa za izricanje krivičnopravne sankcije povodom sporazuma o priznanju krivnje, zaključenog između optuženog i Tužilaštva BiH, u prisutnosti tužioca Tužilaštva Bosne i Hercegovine Ismeta Šuškića, optuženog i njegovog branioca Binase Abaspahić, advokata iz Sarajeva, donio i javno objavio dana 30.11.2010. godine sljedeću

### **P R E S U D U**

#### **Optuženi:**

**Arif Adilović**, sin Rizvana i majke Muše, rođene Preljević, rođen 10.9.1989. godine u Prijepolju, Republika Srbija, JMBG 1009989793943, državljanin Republike Srbije, stalno nastanjen u naselju Velika Župa bb, Općina Prijepolje, Republika Srbija, sa neprijavljenim boravištem u Sarajevu u Ulici Tuzlanska broj 41, Općina Novi Grad, student, nezaposlen, ranije neosuđivan, ne vodi se drugi krivični postupak;

### **K R I V J E**

#### **Što je:**

#### **1. Memović Fuad, H.A. i Adilović Arif – zajedno**

Optuženi **Memović Fuad**, početkom 2010. godine, kao pripadnik organizovane grupe ljudi, u smislu člana 1. stav 19. Krivičnog zakona Bosne i Hercegovine (KZ BiH), koja je djelovala sve do 31.03.2010. godine, a koja je organizovana radi neovlaštene međunarodne prodaje, slanja, prenosa do krajnje destinacije, posredovanja i međunarodnog prometa opojne droge „kokain“, koja je Konvencijom o psihotropnim supstancama iz 1971. godine i Rješenjem o popisu opojnih droga (Službeni list R BiH broj 2/92 i 13/94) proglašena opojnom drogom i čiji se promet može obavljati samo na temelju dozvole nadležnog organa sukladno Zakonu o

proizvodnji i prometu opojnih droga (Službeni list R BiH broj 2/92 i 13/94) i čiji je promet zabranjen odredbama Zakona o sprječavanju i suzbijanju zloupotrebe opojnih droga (Službeni glasnik BiH broj 8/96), iz Republike Paragvaj u Bosnu i Hercegovinu i to s ciljem dalje prodaje u Bosni Hercegovini i s ciljem sticanja protivpravne imovinske koristi, a kojoj organizaciji su pristupili njemu dobro poznati optuženi **H.A, Adilović Arif i navodno lice po imenu Janete Reginnato iz Paragvaja**, pa je tako organizovana grupa ljudi u mjesecu martu 2010. godine organizovala nabavku i prenos cca 1 kg opojne droge „kokain“ iz Republike Paragvaj u BiH, na način da je optuženo lice Janete Reginnato, opojnu drogu „kokain“ upakovanu u aluminijske remenice, po prethodnom dogovoru i uputama optuženog Memović Fuada, poslalo sa adrese avenija Euzebio Ayala broj 706 Assuncion u Paragvaju na adresu Humska 18, 71000 Sarajevo na ime Adi Hasanović (na kojoj se inače nalazi stan u vlasništvu H.L, supruge optuženog H.A.), koji stan je prethodno obezbjedio i pripremio optuženi H.A. na način da je na vratima stana i na pripadajućem poštanskom sandučiću stavio pločice na ime Adi Hasanović, a ključeve od stana i sandučića dao optuženom Memović Fuadu koji je potom te ključeve dao Adilović Arifu, koja pošiljka je upućena redovnom avionskom poštom i koju opojnu drogu je, po prethodnom dogovoru i uputama optuženog Memović Fuada, dana 31.03.2010. godine u Glavnom poštanskom centru na adresi Put života bb Sarajevo, preuzeo optuženi Adilović Arif koristeći pri tome krivotvorenu ličnu kartu CIPS-a na ime Adi Hasanović broj 07DUCD162 na način da je istu prezentirao ovlaštenom radniku pošte prilikom preuzimanja paketa, zajedno sa obavjesti o prispjeću pošiljke, koju je prethodno preuzeo iz poštanskog sandučića sa adrese Humska 18, 71000 Sarajevo, a koju ličnu kartu mu je prethodno obezbjedio optuženi Memović Fuad i uručio posredstvom optuženog H.A., koju opojnu drogu su potom optuženi Memović Fuad, H.A. i Adilović Arif sklonili u prostorije firme „ATAL Group“ d.o.o. Sarajevo, gdje su odmah zatim pristupili otvaranju paketa iz kojeg su izvadili aluminijske remenice u kojima se nalazila opojna droga kokain i odložili je u magacinski prostor, da bi potom Memović Fuad izašao napolje da baci paket, kojom prilikom su policijski službenici Državne agencije za istrage i zaštitu optužene Memović Fuada, H.A. i Adilović Arifa lišili slobode

## **2. Memović Fuad i Adilović Arif – zajedno**

U toku septembra mjeseca 2009. godine optuženi Memović Fuad pomoću njemu poznatog lica nabavio krivotvorenu ličnu BH kartu - CIPS na način da je od optuženog – svog rođaka Adilović Arifa pribavio njegove fotografije i u saradnji sa njemu poznatim licem izradio krivotvorenu ličnu kartu br. 07DUCD162 na ime Hasanović Adi koristeći fotografije Adilović Arifa, a zatim ličnu kartu predao Adilović Arifu s namjerom da je po njegovim uputama upotrijebi dana 31.03.2010. godine, što je ovaj i učinio prilikom preuzimanja pošiljke - paketa kod Pošte II, u kojem se nalazila droga „kokain“.

**Dakle**, pod tačkom 1. presude optuženi postao članom organizovane grupe ljudi, koja je formirana radi međunarodne prodaje, prenosa, isporuke opojne droge kokain, koja je nabavljena iz Republike Paragvaj, od njemu poznatog lica sa namjerom daljnje prodaje, njemu poznatim osobama na području Sarajeva i BiH, a pod tačkom 2. optuženi upotrijebio lažnu ispravu – ličnu kartu, kao pravu

**Čime je** radnjama opisanim pod tačkom 1. presude počinio krivično Ncovlašteni promet opojnim drogama iz člana 195. stav 2. KZ BiH, te radnjama opisanim pod tačkom 2. presude krivično djelo Krivotvorenje isprave, iz člana 373. stav 2. KZ F BiH, sve u vezi s članom 29. KZ BiH

**Pa mu Sud**, primjenom navedenih zakonskih propisa uz primjenu odredbi iz članova 39., 42., 48., 49. i 50. KZ BiH

**utvrđuje** za krivično djelo Ncovlašteni promet opojnim drogama iz člana 195. stav 2. KZ BiH **kaznu zatvora u trajanju od 2 (dvije) godine**, a za krivično djelo Krivotvorenje isprave, iz člana 373. stav 2. KZ F BiH **kaznu zatvora u trajanju od 6 (šest) mjeseci**, te mu primjenom člana 53. KZ-a BiH **izrice**

### **JEDINSTVENU KAZNU ZATVORA U TRAJANJU OD 2 (dvije) GODINE I 3 (tri) MJESECA.**

Na osnovu člana 56. Krivičnog zakona Bosne i Hercegovine optuženom se u izrečenu kaznu zatvora ima uračunati vrijeme provedeno u pritvoru, počev od 31.03.2010 godine pa nadalje.

U skladu sa odredbama člana 74. KZ BiH, od optuženog se ima oduzeti krivotvorena lična karta na ime Adi Hasanović, broj 07DUCD162.

Na osnovu člana 74. ZKP BiH optuženom se imaju vratiti predmeti oduzeti po Potvrdi SIPA-e br. 17-02/3-6/10 od 31.03.2010. godine, o privremenom oduzimanju predmeta od Arifa Adilovića (rokovnik i kartic PIN i PUK, mobilni telefon marke „Samsung“).

Na osnovu člana 188. stav 4. Zakona o krivičnom postupku Bosne i Hercegovine optuženi se u cijelosti oslobađa obaveze da naknadi troškove krivičnog postupka, te isti padaju na teret budžeta Suda Bosne i Hercegovine.

### **O b r a z l o ž e n j e**

Tužilaštvo Bosne i Hercegovine podiglo je optužnicu, broj KT-133/10 od 16.07.2010. godine, kojom se Fuadu Memoviću, Adnanu Hamziću i Arifu Adiloviću, na teret stavlja počinjenje krivičnog djela Organizovani kriminal, iz član 250. stav 2.

i 3. KZ BiH, u vezi sa krivičnim djelom Neovlašten promet opojnim drogama iz člana 195. stav 1. KZ BiH te optuženi Hamzić i Adilović krivično djelo Krivotvorenje isprave iz člana 373. stav 2. KZ F BiH.

Nakon što je optužnica potvrđena rješenjem sudije za prethodno saslušanje, te nakon što su se optuženi izjasnili da nisu krivi, započeo je glavni pretres u ovoj krivičnopravnoj stvari. Dana 09.11.2010. godine Tužilaštvo je dostavilo izmijenjenu optužnicu, kojom se optuženom Adiloviću na teret stavlja krivično djelo Neovlašten promet opojnim drogama iz člana 195. stav 2. KZ BiH, u sticaju sa krivičnim djelom Krivotvorenje isprave iz člana 373. stav 2. KZ F BiH, sve u vezi sa čl. 31. KZ BiH

Sudu je istovremeno dostavljen Sporazum o priznanju krivnje, zaključen između optuženog Fuada Memovića i Tužilaštva BiH. Sud je po prihvaćanju sporazuma razdvojio postupak u odnosu na Fuada Memovića te optuženog oglasio krivim presudom od 12.11.2010. godine.

Dana 19.11.2010. godine Sudu je dostavljen Sporazum o priznanju krivnje, zaključen između optuženog Arifa Adilovića i Tužilaštva BiH, a u kojem optuženi Adilović priznaje krivnju za krivična djela koja mu se optužnicom stave na teret, odnosno krivično djelo Neovlaštenu promet opojnim drogama iz člana 195. stav 2. KZ BiH, za radnje iz tačke 1. Optužnice i krivično djelo Krivotvorenje isprava iz člana 373. stav 2. KZ F BiH. Sa druge strane, Tužilaštvo predlaže da, ukoliko Sud prihvati predloženi sporazum, optuženom izrekne jedinstvenu kaznu zatvora u trajanju od 2 (dvije) godine i 3 (tri) mjeseca. Po prihvatanju predmetnog sporazuma, doneseno je rješenje kojim je postupak, u odnosu na optuženog Adilovića razdvojen i vodi se pod brojem S1 2 K 003631 10 K.

Na pretresu za razmatranje sporazuma o priznanju krivnje održanom dana 30.11.2010. godine, Sud je utvrdio da su ispunjeni svi uslovi za zaključenje Sporazuma o priznanju krivnje propisani članom 231. stav 6. tač. a) do e) ZKP BiH, odnosno da je optuženi sklopio sporazum dobrovoljno, svjesno i sa razumijevanjem, a nakon što je upoznat sa mogućim posljedicama, uključujući i posljedice vezane za eventualne imovinsko pravne zahtjeve i troškove krivičnog postupka. Utvrđeno je također da je optuženi svjestan i činjenice da se na ovaj način odriče prava na suđenje i da ne može izjaviti žalbu na krivičnopravnu sankciju, koja će mu biti izrečena.

Sud je također utvrdio i da postoji dovoljno dokaza o krivnji optuženog, za predmetna krivična djela te je ispitano i da li je predložena kazna u skladu sa odredbama stava 3. člana 231. ZKP BiH.

Naime, u toku postupka Tužilaštvo je saslušalo svjedoke Dadu Doborca, Adisa Hodžića, Haruna Kadića, prikrivene istražitelje kodnih naziva „Boro“ i „Ramiz“, te vještaka Prof. Esada Bilića, vještaka grafologa, Mevludina Hajdara, vještaka za hemijska ispitivanja te Irhada Kosa. Uloženi su i sljedeći materijalni dokaz: Izvještaj

Dražavne agencije za istrage i zaštitu broj broj: 17-02/3-04-1-161-40-KU-12/10, od 01.04.2010. godine o počinjenom krivičnom djelu i izvršiocima protiv osumnjičenih Memović Fuada i dr., Akt SIPE br. 17-02-04-1-161-2/10 od 19.03.2010. godine – Informacija Carinske policije SR Njemačke od 2 kg. „kokaina“ sa priložima i Akt SIPE br. 17-02-04-1-161-16/10 od 25.03.2010. godine – Informacija Carinske policije SR Njemačke od 2 kg „kokaina“, Nalaz i mišljenje F MUP-a FUPA – Centar za forenziku i podršku – Odjeljenje za krim.tehnička vještačenja Sarajevo br. 09-14/1-36 od 05.04.2010. godine o ispitivanju nepoznate materije, Nalaz i mišljenje vještaka grafologa – krim.tehnička grafološka ekspertiza prof. Bilić Esada od 06.07.2010. godine, sa krivotvorenom ličnom kartom BiH serijskog broja 07DUCD62 na ime Hasanović Adi, Fotodokumentacija SIPE br. 17-02/3-4-1-161-55/10 od 05.05.2010. godine, koja se odnosi na krijumčarenje kokaina -„Nadzirani prevoz isporuka predmeta krivičnog djela“ po naredbi Suda BiH br. KPP-23710 od 19.03.2010. godine i to: Fotodokumentacija SIPE br. 17-02/8-4-1-15/10 od 22.04.2010. godine, a odnosi se na pretres PMV reg oznaka 162-T-071, Fotodokumentacija SIPE br. 17-02/8-4-1-16/10 od 22.04.2010. godine, a odnosi se na uviđaj na okolnosti pronalaska ambalaže od poštanskog paketa, Fotodokumentacija SIPE br. 17-02/8-4-1-18/10 od 22.04.2010. godine, a odnosi se na izradu remenica, Fotodokumentacija SIPE br. 17-02/8-4-1-19/10 od 22.04.2010. godine, a odnosi se na pretres PMV reg. onaka E52-O-896, Fotodokumentacija SIPE br. 17-02/8-4-1-21/10 od 22.04.2010. godine, a odnosi se na pretres stana vl. Hamzić Adnana, Fotodokumentacija SIPE br. 17-14/1-7-38/10 od 12.04.2010. godine koja se odnosi na pretres stana Memović Fuada, Fotodokumentacija SIPE br. 17-14/1-7-39/10 od 12.04.2010. godine koja se odnosi na pretres stana vl. Kajasa Kata Fotodokumentacija SIPE br. 17-14/1-7-40/10 od 20.04.2010. godine koja se odnosi na pretres prostorija „ATAL Group“ d.o.o. Sarajevo, Fotodokumentacija SIPE br. 17-14/1-7-41/10 od 20.04.2010. godine koja se odnosi na pretres kuće Adilović Arifa, Fotodokumentacija SIPE br. 17-14/1-7-42/10 od 21.04.2010. godine koja se odnosi na fotografisanje poštanskog sandučeta interfona u ul. Humska br. 18 općina Novo Sarajevo, Službeni Izvještaj SIPE – Službe za operativnu podršku – Odsjek za operativni i tehnički nadzor – Tim za kompjuterske analize br. 17-09/2-04-7-733-4/10 od 30.06.2010. godine o vještačenju digitalnih dokaza predmeta – mobilnih telefona oduzetih od osumnjičenog Memović Fuada, Hamzić Adnana i Adilović Arifa, Informacija SIPE – KIO br. 17-02/3-04-1-161-44/10 od 01.04.2010. godine, a osnosi se na informaciju Carinske policije SR Njemačke o 2 kg. „kokaina“ kao i Izvještaj o realizaciji Naredbi Suda BiH za provođenje posebnih istražnih radnji i realizaciji naredbi Suda BiH za provođenje posebnih istražnih radnji i realizaciji naredbi Suda BiH za pretres, Zapisnikom SIPE – KIO br. 17-02/3-04-1-161-18/10, o uviđaju i preliminarnom vještačenju od 25.03.2010. godine, sa fotodokumentacijom SIPE br. 17-02/8-04-1-11/10 od 29.03.2010. godine, a odnosi se na obradu prispjele pošiljke u predmetu KTA-148/10, Službeni izvještaj SIPE – KIO br. 17-02/7-INT-647/10 od 31.03.2010. godine, sačinjen od strane prikrivenog istražitelja „Ramiz“ na okolnosti provedenih posebnih istražnih radnji, Službeni izvještaj SIPE – KIO br. 17-02/7-INT-648/10 od 31.03.2010. godine, sačinjen od strane prikrivenog istražitelja „Boro“ na okolnosti provedenih posebnih istražnih radnji, sa poštanskom uplatnicom br. 89/20 od 31.03.2010. godine na ime Hasanović Adi u iznosu od 8,50

KM, Zapisnik SIPE – KIO br. 17-02-04-1-161-25/10 od 30.03.2010. godine, o uviđaju obavljenom prilikom izrade i zamjene aluminijskih remenica i njihovog sadržaja, Izvještaji SIPE – Služba za operativnu podršku Odsjek za operativni tehnički nadzor br. 17-09/2-04-7-356-28/10 od 08.04.2010. godine o nadzoru (19 izvještaja o nadzoru sa dva CD-a), Izvještaj SIPE br. 17-9/7-04-7-363-35/10 od 26.05.2010. godine i DVD-ovi sa audio zapisom o preduzimanju posebnih istražnih radnji, nadzor i tehničko snimanje telekomunikacija (3x DVD) i Izvještaj br. 17-9/7-04-7-363-36/10 od 26.05.2010. godine (9X DVD), Potvrda SIPE br. 17-02/3-6/10 od 31.03.2010. godine o privremenom oduzimanju predmeta od Adilović Arifa, sa priložima i br. 17-02/3-3-1/10 od 31.03.2010. godine (sa rokovnikom i karticom PIN i PUK) i privremenom oduzimanju predmeta mobilnih telefona marke „Samsung“ (nalazi se kod SIPE), Potvrda SIPE br. 17-02/3-5-1/10 od 31.03.2010. godine o privremenom oduzimanju predmeta od Hamzić Lejle supruge osumnjičenog Hamzić Adnana (laptop marke „Simens“ i dvije ultra kartice i certifikati nalazi se kod SIPE) i br. 17-02/3-3-2/10 od 31.03.2010. godine privremenom oduzimanju predmeta mobilnih telefona pod tačkom od 1 – 8, sa karticom koji se nalaze kod SIPE, sa priložima, Potvrda SIPE br. 17-02/3-2/10 od 31.03.2010. godine o privremenom oduzimanju predmeta od Memović Anite supruge osumnjičenog Memović Fuada, (mobilni telefon nalazi se kod SIPE i ugovor o kupoprodaji nekretnina sa predugovorom), Potvrda SIPE br. 17-02/3-4/10 od 31.03.2010. godine o privremenom oduzimanju predmeta od Hamzić Adnana, (sa mobilnim telefonom marke „Sagem“ nalazi se kod SIPE) i rokovnikom zelene boje, Potvrda SIPE br. 17-02/3-4-1/10 od 31.03.2010. godine o privremenom oduzimanju predmeta od Memović Fuada, sa priložima, br. 17-02/3-4-2/10 od 31.03.2010. godine i br. 17-02/3-4-3/10 od 31.03.2010. godine, (sa mobilnim telefonom marke „Nokia“, marke „Fcerari“ sa SIM karticama nalaze se kod SIPE) i pasoš na ime Memović Fuada izdat od strane MUP R Srbije br. 008042701, Potvrda SIPE br. 17-02/3-3/10 od 31.03.2010. godine o privremenom oduzimanju predmeta od Hamzić Adnana, (dvije remenice sa 4 žlijeba srebreno-sive aluminijske boje, prečnika 175 mm, debljine 75 mm, valjkastog oblika) sa sadržajem droge „kokain“ cca 1 kg., Prilog Zapisniku SIPE br. 17-02/5-04-1-161-33/10 od 31.03.2010. godine – trag izuzet prilikom pronalaska ambalaže poštanskog paketa, Prilog akta Federalne uprave policije broj 14/1-36 od 05.04.2010. godine – vještačenje: dva aluminijska paketa oblika remenica za kamion, sadržaja ostaci bijele praškaste ispitivane materije-čisti kokain, neto masa materije: 549,19 g i 450,04 g (masa prije ispitivanja je iznosila: 549,71 g-uzorak označen brojem 1 i uzorak označen brojem 2-450,14 g), Službena zabilješka SIPE – KIO br. 17-02/3-59/10 od 31.03.2010. godine na okolnosti postupanja u predmetu „Paragvaj“ i izvršenih operativnih provjera na adresi Humska br. 18 Sarajevo, Zapisnik SIPE – KIO br. 17-02/5-04-1-161-33/10, od 31.03.2010. godine o izvršenom uviđaju na licu mjesta u ul. Zmaja od Bosne br. 14 općina Novo Sarajevo, Službena zabilješka SIPE Službe za operativnu podršku br. 17-09/2-04-7-356-35/10 od 06.05.2010. godine i CD-3 sa video zapisom po Naredbi Suda BiH br. KPP-23/10 od 19.03.2010. godine, Operativna evidencija MUP Kantona Sarajevo – Sektor krim. Policije Odjeljenje za posebne namjene broj 02/2-3-1045/10 od 01.04.201. godine za osumnjičenog Memović Fuada sa Rješenjem Opštine Prijepolje broj 201-5/2003 od 07.04.2003. godine o promjeni ličnog imena Memović Fuada u lično ime Preljević

Denis i operativna evidencija br. 02/2-3-1043/10 od 01.04.2010. godine za osumnjičenog Hamzić Adnana i operativna evidencija br. 02/2-3-1042/10 od 01.04.2010. godine za osumnjičenog Adilović Arifa.

Cijeneći navedene dokaze pojedinačno i dovodeći ih u međusobnu vezu, te cijeneći priznanje optuženog, van razumne sumnje je utvrđeno da je optuženi počinio predmetna krivična djela.

Naime, iz izjava prikrivenih istražitelja „Bore“ i „Ramiza“ proizlazi da je optuženi preuzeo sporni paket u prostorijama Pošte BiH, nakon čega se ispred zgrade Pošte, susreo sa Fuadom Memovićem i H.A. Svjedoci su podrobno opisali sve radnje koje su poduzeli, u svojstvu prikrivenih istražitelja, tačnije postupak obrade spornog paketa i preuzimanje istog od strane optuženog. Vještak Mevludin Hajdar potvrdio je da je materija odstranjena iz aluminijskih remenica, po hemijskim svojstvima 100% čisti „kokain“. Prestretnuti razgovori, kako je pojasnio vještak Irhad Kos, potvrđuju komunikaciju optuženog sa drugim optuženim, odnosno osumnjičenim licima. Vještak Esad Bilić detaljno je opisao mane i nedostatke spornog dokumenta – lične karte na ime Adi Hasanović, na osnovu kojih je došao do zaključka da je riječ o krivotvorenom dokumentu. Sve navedeno potvrđuju uloženi materijalni dokazi, a prvenstveno nalazi i mišljenja pomenutih vještaka.

Nadalje, na osnovu predočenih dokaza, utvrđeno je da je optuženi bio svjestan svojih djela i da je htio njihovo učinjenje, odnosno da je predmetna krivična djela počinio sa direktnim umišljajem, svjesno poduzimajući gore opisane krivično-pravne radnje. Navedeni zaključak potvrđuje držanje optuženog, na što ukazuju svi provedeni dokazi. Iz provedenih posebnih istražnih radnji - nadzor i tehničko snimanje telekomunikacija, vidljiv je odnos optuženog prema djelu i njegovo htijenje da ista izvrši. Temeljem svega naprijed navedenog, utvrđeno je da postoji dovoljno dokaza o krivici optuženog, te je Sud, uz prethodno utvrđeno ispunjenje ostalih uslova iz člana 231. stav 6. tačka a) do e) ZKP BiH, prihvatio uložene sporazume.

Razmatrajući predloženu krivično-pravnu sankciju, Sud je cijenio sve okolnosti od značaja na visinu kazne. Sud je kao naročito olakšavajuću okolnost cijenio činjenicu da je optuženi priznao krivnju te zaključio predmetni sporazum, odnosno da je izrazio spremnost za saradnju sa Tužilaštvom i kajanje zbog počinjenog djela. Sud je također imao u vidu činjenicu da je riječ o mladoj osobi koja do sada nije kažnjavana, i protiv koje se ne vodi drugi krivični postupak. Otežavajućih okolnosti na strani optuženog Sud nije našao. Optuženom je stoga, izrečena, kazna kao u izreci ove presude, primjenom odredaba člana 53. KZ BiH, pri čemu Sud nalazi da su predložene i utvrđene kazne, te izrečena jedinstvena kazna, srazmjerne težini počinjenih krivičnih djela i stepenu krivične odgovornosti optuženog i nalazeći da će na taj način ostvariti svrha krivičnopravne sankcije, kako u vidu generalne, tako i u vidu specijalne prevencije.

Sud je radnje optuženog kvalifikovao kao radnje saizvršioca, u skladu sa članom 29. KZ BiH. Naime, takva kvalifikacija proizilazi iz samog činjeničnog opisa

predmetnih krivičnih djela, iako Tužilaštvo u sporazumu propušta da na taj način izvrši kvalifikaciju. Budući da Sud nije vezan pravnom kvalifikacijom Tužilaštva, na ovaj način nije došlo do povrede identiteta optužbe.

Na osnovu člana 56. Krivičnog zakona Bosne i Hercegovine optuženom se u izrečenu kaznu zatvora ima uračunati vrijeme provedeno u pritvoru, počev od 31.03.2010 godine pa nadalje.

U skladu sa odredbama člana 74. KZ BiH, od optuženog se ima oduzeti krivotvorena lična karta na ime Adi Hasanović, broj 07DUCD162, kao predmet nastao počinjenjem i upotrijebljen za počinjenje krivičnog djela.

Na osnovu člana 74. ZKP BiH optuženom se imaju vratiti predmeti oduzeti po Potvrdi SIPA-e br. 17-02/3-6/10 od 31.03.2010. godine o privremenom oduzimanju predmeta i to rokovnik i kartic PIN i PUK, mobilni telefon marke „Samsung“, s obzirom da navedeni predmeti ne ispunjavaju zakonske uslove za izricanje mjere sigurnosti oduzimanje predmeta.

Na osnovu člana 188. stav 4. Zakona o krivičnom postupku Bosne i Hercegovine optuženi se u cijelosti oslobađa obaveze da naknadi troškove krivičnog postupka, te isti padaju na teret budžeta Suda Bosne i Hercegovine. Naime, utvrđeno je da je optuženi student, bez redovnih primanja i imovine i nije u mogućnosti da snosi troškove ovog postupka.

**ZAPISNIČAR**

**PREDSJEDNIK VIJEĆA  
SUDIJA**

**Belma Čano**

**Esad Fejzagić**

**POUKA O PRAVNOM LIJEKU:** Protiv ove presude žalba je dozvoljena Apelacionom vijeću ovog Suda u roku od 15 dana od dana prijema ove presude. Žalba nije dozvoljena u odnosu na odluku Suda o krivičnoj sankciji.